



LG- NDL

लैफ्टिनेंट गवर्नर मनोज सिन्हा होरें भारतीय सेना टुकड़ियें ते सिविल सेवाएं दे आला अफसरें ते मैत्रीपूर्ण मुखें दे प्रतिनिधिमंडलें जेड़े राष्ट्र रक्षा कालेज (NDC ) च इक कोर्स च शामिल हे, उन्दे कन्नै गल्लबात कीती। इस गल्लबात दरान एल.जी होरें आखेया जे हाल च रचे गेदे इतिहास च प्रधानमंत्री नरेन्द्र मोदी हुंदी अगुआई च किते गेदे ऑपरेशन सिंदूर दे राएं भारतीय सेना नै बड़ी गै तगड़ेयाई कन्नै दुश्मनं गी जवाब दिता। उनें इब्बी आखेया जे भारत च अगर हून कोई आतंकवादी हमला हुंदा ऐ ते उसी युद्धात्मक मन्नेया जाहग ते ओहदे बदले करारा जवाब दिता जाग। तौआई BJP दे राष्ट्र उप-अध्यक्ष ते संसदीय कमेटी दे सार्वजनिक उपक्रम दे बैजंत जय पांडा होरें एल.जी. हुंदे कन्नै मलाटी कीती। बैजयंत जय पांडा हुंदे कन्नै डाक्टर भागवत किशनराव करड जेड़े राज्यसभा दे सांसद न ओह बी शामिल हे।

<><><><><><>

Dy. CM Pharmacist Day

मुखमंत्री सुरिंदर चौधरी होरें कल जम्मू दे इक विश्व फारमेसी कालेज च विश्व फारमेसी दिवस दा उघाटन कीता। इस मौके पर सभा गी सम्बोधित करदे होई उनें गलाया जे सेहत सरबन्धी सेवाएं च फार्मासिस्टें दी बड़ी गै मुख भूमिका ऐ ते उनें इस मौके पर कालेज दे विद्यार्थियें गी आखेया जे ओह उन्दे थमां भविक्ख च इस भूमिका गी खरी चाली निभाने दी मेद रखदे न।

उनें कोविड दरान फार्मासिस्टें दी अनथक सेवां दी बी सराहना कीती ते गलाया जे जिसलै लोक घरें च सुरक्षा लेई आराम नै बैठे दे हे, उसलै सेहत सरबन्धी कार्यकर्ता गै इस महामारी दे खलाफ जंग लड़ा रदे हे। उपमुख्यमंत्री होंरे इस मौके पर सेहत प्रणाली गी मजबूत बनाने लेई फार्मासिस्टें दी भूमिका उप्पर लौह पाई ते उन्दी सराहना कीती।

<><><><><><>

Rana –Union Min.

जंगलात मंत्री जावेद राणा होंरे केन्द्रीय पर्यावरण जंगलात ते जलवायु मंत्री भूपेन्द्र यादव हुंदे कन्नै नमीं दिल्ली च मलाटी किती ते जम्मू-कश्मीर दे जंगलात ते पर्यावरण सरबन्धी गंभीर मुद्दे पर चर्चा कीती। इस चर्चा दौरान उनें जम्मू-कश्मीर दे केन्द्रीय सरकार दे सांझे जतनें दी लोड़ पर जोर भरेया ते संस्थागत क्षमता ते पारिस्थितिक बहाली गी बधाने ते मुख्ख जंगलाती ते पर्यावरण कार्यक्रमें दी समै-सिर अमलावरी करने बारे आक्खेया। राणा होंरे केन्द्र प्रायोजित जंगलात ते अग्नि निवारण ते प्रबंधन योजना आस्तै 3.5 करोड़ धनराशी जारी करने लेई आक्खेया, जेदे लेई 2024-25 वित्तिय बरे दी पहलै गै कार्य-योजना प्रस्तुत किती गेदी ऐ।

<><><><><><>

Sewa Parv –Defence Innovation

“सेवा पर्व” पैहलकदमी जिसी मुख्ख भरै च मनाया जा रदा ऐ, एदे चलदे अस तुसेंगी दस्सगे जे भारत दा रक्षा नवाचार तंत्र किस चाली रक्षा क्षेत्र च महारत आनने लेई कम्म करा रदा ऐ।

नरेन्द्र मोदी सरकार नै खीरी 11एं बरे दरान रक्षा क्षेत्रें च नवाचार आनने उप्पर जोर भरेया ऐ ते एदे लेई I-Dex पैहलकदमी गी अप्रैल 2018 च लांच किता गया हा। ते I-Dex सरबंधी स्टार्ट अपस ते MSMEs दे तैहत हुने तोड़ी 2400 करोड़ रपे थमां मते मुल्ल दियां 43 चीजां सेना कर्मियें राएं खरीदी गेइयां न। एदे कन्नै रक्षा क्षेत्र च स्वदेशी नवाचार आस्तै विश्वास ते आत्मनिर्भरता दी झलक लब्बदी ऐ।

<><><><><><>

### GST Reforms

नमीं पीढी दे GST टैक्स सुधारें तैहत सरकारै फैक्ट्रियें वैगरा च इस्तेमाल होने आहले कामन एफ्लुएंट ट्रीटमेंट प्लांटें पर बी GST दी दर 12 प्रतिशत कोला घटाइयै 5 प्रतिशत करी दिती ऐ। एहदे कन्नै मते-मते उद्योगें -कारखानें आहले अपने फैक्ट्रियें च एह संयत्र लाने लेई प्रेरत होगन ते फैक्ट्रियें दा गंदा पानी या होर रेंद-खेंद दी निकासी कोला पैहले इनें संयत्रें दी मदद कन्नै उसी साफ करी लैगन जेहदे नै आले-दोआलें जां नदियें तलाएं च फैक्ट्रियें दी गंदगी कन्नै होने आहले प्रदूषण जा नुकसान कोला बचेया जाई सकोग। तौंआई पर्यावरण च खपी जाने आहले मोमी लफाफें ते झोले पर बी GST 18 प्रतिशत कोला घटाइयै 5 प्रतिशत करी दिता गेदी ऐ। इस्सै चाल्ती सोलर पम्प ते इस चाली दे होर दुए उपकरण बी GST घटाने कारण सस्ते होई गेन जेहदे पर लोकें मती खुशी प्रगट कीती.....

<><><><><><>

## Pro. Announcement

आकाशवाणी दा क्षेत्रीय समाचार एकांश जम्मू “सेवा पर्व 2025” दे तैहत अपने विशेष कार्यक्रमें दी श्रृंखला दे इक हिस्से दे तौरा पर अतरु 27 सितम्बर गी 30एं मिन्टे दी इक विशेष परिचर्चा प्रसारत करने जा रदा ऐ, जेहदा विषय रखेया गेदा ऐ- “इक विश्व शक्ति दे रूपे च उभरदा भारत”। इस कार्यक्रम च स्हाड़े परोहने होगंन वरिष्ठ पत्रकार ते विश्लेषक मनुश्रीवत्स जेहड़े इस विषय दे बक्ख-बक्ख पैहलुएं पर अपने विचार सांझे करंगन। इंदे कन्नै गल्लबात करगंन स्हाड़े न्यूज एंकर जगमोहन शर्मा ते अभिलाषा शर्मा। चेता रखेयो एह कार्यक्रम अतरु शनिवारें दिने साइडे 12.30 बजे स्हाड़े इस्सै चैनल पर मीडियम वेव 303 मीटर यानी 990 किलोहर्टस ते FM 100 इशारिया 3 मैगाहर्टस पर प्रसारत कीता जाहग।

<><><><><><>

## Satish –Oil Companies

खुराक- सिविल सप्लाई ते उपभोक्ता मामलें दे मंत्री सतीश शर्मा होरें कल मुख्ख तेल कम्पनियें दे प्रतिनिधियें कन्नै इक बैठक लाई ते जम्मू-कश्मीर च एल.पी.जी. दी सप्लाई ते आपूर्ति दी समीक्षा कीती। एह बैठक विशेष रूप कन्नै हाल च हाड़े करी होई दी सिडकें दी तबाई करी बनी दी स्थिति दे चलदे कीती गई। चर्चा दे दरान मंत्री होरें जम्मू-कश्मीर दे उपभोक्ते तगर एल.पी.जी. सिलेंडरें दी उपलब्धता सुनिश्चित करने दी लौड़ पर जोर दिता।

तेल कम्पनिये दे प्रतिनिधिये मंत्री होरे गी एह भरोसा दोआया जे आपूर्ति श्रृंखला हर दिन बनाई रक्खी जा रदी ऐ ते असुविधा थमां बचाने लेई हर मुमकिन जतन किते जा रदे न। मंत्री होरे ग्रामीण बंड सरिस्ते गी होर मजबूत करने पर बी जोर भरेया।

<><><><><><>

CJ-CAP

लोकें गी सखल्लें ते तौले न्यां दोआना यकीनी बनाने बक्खी इक महत्वपूर्ण गें पुट्टदे होई जम्मू-कश्मीर ते लद्दाख हाई कोर्ट दे चीफ जस्टिस होरे मामले दे तौले नबेड़े लेई इक व्यापक कार्ययोजना शुरु कीती ऐ। इस पैहल दा मकसद अदालतें च औने आलें मामले गी ते कन्नै पिच्छले बकाया पेदे मामले गी इस बवस्था तैहत तौले नबेड़ने पर ध्यान दिता गेदा ऐ। अदालतें च लम्मे चिरे सवां लटके पेदे मामले पर चिंता प्रगट करदे होई चीफ जस्टिस होरे आक्खेया जे इस नमीं बवस्था कन्नै उनें सब्भनें मामले गी तौले शा तौले नबेड़ने च मदद थोग जेड़ें केंइयें बरें थमां अदालतें च लटकदे पेदे न।

<><><><><><>

CS -Health Projects

मुख्य सचिव अटल डुल्लु होरे प्रधानमंत्री आयुष्मान भारत सेहत ढांचा मिशन- PM ABHIM ते इमरजेंसी कोविड रेस्पांस पैकेज ECRP दे दुए गेड़ तैहत बक्ख-बक्ख जिले च जारी केंई महत्वपूर्ण परियोजनाएं दी समीक्षा कीती। मुख्य सचिव होरे क्रिटिकल केयर सरबंधी इनें प्रोजैक्टें दी बक्खरे-बक्खरे तौरा पर तफसीली जानकारी हासल कीती।

जम्मू-कश्मीर च सेहत ढांचे ते सेहत सुविधाएं गी होर बेहतर बनाने दे महत्वै पर लौ पांदे होई अटल डुल्लु होरें कम्मैं गी तोड़ चाढ़ा रदियें एजेंसियें गी जोर देइयें आखेया जे इनें महत्वपूर्ण परियोजनाएं गी बेल्ले सिर तोड़ चाढ़ना यकीनी बनाने लेई कम्मैं दी रफतार च तेजी आहन्ने दा निर्देश दिता। उनें आखेया जे इनें सुविधाएं दे त्यार होई जाने कारण हर इलाके दे लोके गी हर चाली दियां सेहत सुविधा उन्दे घरे कश अपने इलाके च गै उपलब्ध होई जागंन, टकोहदा करियें नमें मैडिकल ते जिला अस्पतालें च गै।

<><><><><><>